

POPERA GA COROCHAWA
 YEXMAGŪXŪ GA
 YAXŌGŪXŪTANŪWA NAMUXŪ GA
 PAURU

Pauru rü nüxŭ narŭmoxĕ ga yema yaxŏgŭxŭ ga Corochawa yexmagŭxŭ

¹⁻² Pa Chaueneĕgŭ ya Corochaarŭ Īānewa Ngĕxmagŭxex, choma i Pauru rŭ wŭxigu namaā i taeneĕ i Timutéu nixĭ i pexcĕx tanaxŭmatŭxŭ i űāā popera. Rŭ choxŭ nixĭ ga Tupana ga inamuāchixŭ na guxŭwama nüxŭ chixuchigŭxŭcĕx i Ngechuchu ya Cristuarŭ ore. Rŭ pexcĕx chanaxŭmatŭ i guxāma i pema ya chaueneĕgŭ ya aixcŭma Tupanaārŭ duŭxŭgŭ ixĭgŭxe ya Cristuaxŭ yaxŏgŭxe. Rŭ chanaxwĕxe i Tanatŭ ya Tupana pexŭ narŭngŭxĕĕ na meā pegŭmaā pemaxĕxŭcĕx rŭ petaāĕgŭxŭcĕx.

Pauru rŭ yema yaxŏgŭxŭcĕx nayumŭxĕ

³ Rŭ guxŭguma i ngĕxguma pexcĕx tayumŭxĕgŭgu, rŭ moxĕ nüxna taxā ya Tupana ya Nanatŭ ya tŏrŭ Cori ya Ngechuchu ya Cristu. ⁴ Rŭ ngĕmaācŭ tanaxŭ erŭ marŭ nüxŭ tacuāchiga na űuxācŭ aixcŭma meā Ngechuchu ya Cristuaxŭ peyaxŏgŭxŭ, rŭ aixcŭma nüxŭ pengechaŭgŭxŭ i guxŭma i ngĕma duŭxŭgŭ i Tupanaārŭ ixĭgŭxŭ. ⁵ Rŭ nüxŭ tacuĕxgŭ na ngĕmaācŭ meā Tupanapĕxewa pemaxĕxŭ erŭ penayauxgŭchaŭ i ngĕma mexŭgŭ i Tupana pexŭ namaā nguxŭxŭ i daxŭguxŭ i naānewa. Rŭ űuxma rŭ meā ĩpenanguxĕĕ na penayauxgŭxŭcĕx i ngĕma mexŭgŭ

yerü marü nüxũ pexĩnüē ga Tupanaãrũ ore i mexũ i aixcũma ixĩxũ. ⁶ Rũ ngēmatama ore i mexũ ga pexũtawa nguxũ, rũ guxũwama nangu i ñuxmax. Rũ guxũwama ningũchigũ rũ duũxũgũarũ maxũxũ naxũchicũũ, yema perũ maxũxũ na naxũchicũũxũrũũ ga yexguma nüxũ pexĩnüēgu rũ nüxũ pecuèxgũgu na ñuxãcü Tupana aixcũma pexũ na ngechaũxũ rũ pexũ rüngũxēēchaũxũ. ⁷ Rũ ngēma ore i mexũ nixĩ ga pexũ nangúexēēxũ ga Epáparu ya tomücü ya nüxũ tangechaũgücũ ya wũxigu tomaã Tupanaãrũ orewa puracücü. Nũma rũ Cristuarũ puracũtanũxũ ya mecũ nixĩ, rũ nũma nixĩ i tochicũũ pexũ nangũxēēxũ. ⁸ Rũ nũma ya Epáparu nixĩ i tomaã nüxũ yaxuxũ i pechiga na ñuxãcü Tupanaãē i Üünexũãrũ ngũxēēmaã choxũ pengechaũgũxũ. ⁹ Rũ ngēmacèx i toma ga noxritama pexũ tacuáchigagu, rũ taguma nüxũ itayarüngũmaē na pexcèx tayumũxēgũxũ. Rũ guxũguma Tupanana naxcèx tacagũ na meã pexũ nüxũ nacuèxēēxũcèx i ngēma nũma nanaxwèxexũ na penaxũxũ. Rũ nüxna naxcèx tacagũ na pexna naxããxũcèx i nagúxũraũxũ i cuèx i Naãē i Üünexũwa ne ũxũ. ¹⁰ Rũ nüxna naxcèx tacagũ na meã tórũ Cori naxwèxexũãcũma na pemaxēxũcèx rũ guxũguma penaxũxũcèx i ngēma nũma nanaxwèxexũ. Rũ nüxna naxcèx tacagũ na pexũ natauxchaxēēãxũcèx na togũxũ perüngũxēēgũxũcèx rũ guxũ i ngunexũgu yexeraãcü Tupanaxũ pecuáxũcèx. ¹¹ Rũ nüxna naxcèx tacagũ na norũ pora i mexēchixũmaã pexũ naporaexēēxũcèx, na namaã peporaexũcèx i guxũma i guxchaxũgũ rũ yaxna namaã pexĩnüēxũcèx. ¹² Rũ ñuxũchi tanaxwèxe i taãēãcũma Tanatũ ya Tupanana moxē pexã, erũ nũma pexũ nimexēēgũ na pema rũ ta pe-

nayauxgüxüçèx i ngẽma mexũgü i naxũtawawa ngẽxmagüxũ i nũma tá nüxna naxãxũ i ngẽma duũxũgü i noxrü ixĩgüxũ. ¹³ Yerü nüma ga Tupana rü marü Chatanáméxẽwa tüxũ ínanguxũxẽẽ rü Nane ya nüxũ nangechaũcüméxẽwa tüxũ nangẽxmagüxẽẽ. ¹⁴ Rü guma Nanegagu nixĩ ga tüxũ namaxẽxẽxũ rü tüxũ nüxũ nangechaũxũ ga tórü pecadugü.

Rü yexguma pecaducèx nayuxgu ga Cristu rü Tupana nügümaã nanangüxmüëxẽẽ ga duũxũgü

¹⁵ Taguma texé Tupanaxũ tadau, natürü nüma rü núma nanamu ga Nane na duũxũgü nüxũ daugüxüçèx rü nüxũ nacuèxgüxüçèx na ñuxãcü na yĩxũ i nüma ya Tupana. Rü naxũpa ga guxũma ga tacü i ñuxma ngẽxmaxũ, rü nüxĩra marü nayexma ga Tupana Nane. ¹⁶ Rü Nanexũ nixĩ ga namuxũ ga Tupana na naxũãxüçèx ga guxũma i tacü i ñuxma ngẽxmaxũ i daxüguxũ i naãnewa rü ñoma i naãnewa, rü guxũma i ngẽma nüxũ idauxũ rü ngẽma tama nüxũ idauxũ. Rü yemaãcü nanaxü ga guxũma ga norü orearü ngeruũgü i daxüçũãxãrũ ãëxgacügü rü guxũma ga ngoxogüarü ãëxgacügü. Rü yemaãcü nanaxü ga guxũma na nüxũ yacuèxüũgüxüçèx. ¹⁷ Rü naxũpa i guxũma i tacü i ñuxma ngẽxmaxũ, rü Cristu rü marü nüxĩra nayexma. Rü nagagu nixĩ i meã inanuxũ i guxũma erü nüma nixĩ i namaã inacuáxũ. ¹⁸ Rü nüma ya Cristu rü naëru nixĩ i guxũma i ngẽma yaxögüxũ. Rü nüma nixĩ ga naxũãxũ rü nüxna naxããxũ ga maxũ. Rü nüma nixĩ ga nüxĩra yuwa ínadaxũ na guxũãrũ ãëxgacü yĩxüçèx. ¹⁹ Rü Cristu rü Tupanaxũchi nixĩ, yerü yemaãcü nanaxwèxe ga Tupana. ²⁰ Rü Tupana rü ñoma ga naãnewa nanamu ga Cristu na curuchagu pecaducèx nayuxüçèx. Rü yemaãcü nixĩ ga Tupana nügümaã nangüxmüëxẽẽxũ ga guxũma

i ñoma i nañewa ngẽxmaxũ rü guxũma i daxũguxũ i nañewa ngẽxmaxũ. Rü yemaãcü nanaxü ga Tupana yerü yemaãcü nanaxwexe. ²¹ Rü pema ga ũpa rü tama Tupanamücügü pixĩgü yerü naxchi pexaie nagagu ga perü chixexũ ga nagu perüxĩnüexũ rü pexũxũ. ²² Natürü i ñuxma ya Tupana rü nügümaã pexũ narüngüxmüëxë na namücügü i mexũ pixĩgüxũcèx. Rü yemaãcü nanaxü ga Tupana ga yexguma Cristu duũxũxũ ixĩxgu rü curuchawa ngúxü yangexgu rü yexma nayuxgu. Rü yemaãcü nayu ga Cristu na nügüxütawa pexũ nagagüxũcèx rü napéxewa pimexũcèx rü nataxuxũcèx i perü chixexũ. ²³ Natürü ngema na pengugüxũcèx, rü penaxwexe na guxũguma mea peyaxögüxũ rü meã naga pexĩnüexũ rü taguma nüxũ perüxoexũ i ngẽma norü ore i mexũ ga marü nüxũ pexĩnüexũ. Rũ ngematama ore nixĩ i ñuxma nüxũ yaxugüexũ i gúxũ i naanewa.

Tupana rü Pauruxũ namu na guxũma ga yaxögüxũxũ nangũxëxũcèx

²⁴ Rü ñuxma na woo pexcèx ngúxü chingexũ rü chataãe erü nüxũ chacuèx rü ñaã chaxunemaã choma rü ta chayanguxëe ga yema ngúxü ga Cristu ingexü naxcèx i norü duũxũgü i yaxögüxũ. ²⁵ Rü ñuxma ya Tupana rü choxũ namu na nüxũ charüngüxëxũcèx i guxũma i ngẽma norü duũxũgü i yaxögüxũ. Rü perü mexũcèx nixĩ i choxũ namuxũ na guxũwama meã nüxũ chixuxũcèx i norü ore. ²⁶⁻²⁷ Rü ngẽma Tupanaãrü ore rü ñanagürü:

“Rü Cristu rü pewa nangẽxma i ñuxmax, rü nagagux-
icatama nixĩ i pexũ nangẽxmaxũ i pechica i
daxũguxũ i nañewa i ngextá ínamexëchixũwa”,

ñanagürü. Rū yema nuxcūmaũgüxũ ga duũxũgü rü tama nüxũ nacuèxgü ga yemachiga, natürü ñuxma ya Tupana rü norü duũxũgüxũ nüxũ nacuèxêê. Erü nüma ya Tupana rü norü duũxũgüxũ nüxũ nadauxêêchaũ na ñuxácü poraãcü pexũ nangechaũxũ rü pexũ nangũxêêxũ i guxāma i pema i tama Yudíugü ixĩgüxe. Rū ñuxma i pema na woo tama Yudíugü pixĩgüxũ, natürü pema rü ta pexũ nangẽxma i pechica i daxũgüxũ i naañewa erü Cristuaxũ peyaxõgü. ²⁸ Rū ñuxma i toma rü Cristuchigaxũ nixĩ i tixuxũ. Rū ngema ore i Tupanaarü cuèx nawa ngexmaxũmaã nixĩ i guxũma i duũxũgüxũ tixucuxẽgüxũ rü tanangúxêêxũ na ngemaãcü ngearü chixexũáxũ Cristuxũtawa tagagüxũ. ²⁹ Rū ngẽmatama puracü nixĩ i nawa poraãcüxüchima chapuracüamaxũ woo tacü rü guxchaxũ chauxcèx ínguxgu. Rū guxũma i ngẽma pora i Cristu choxna āxũ i chowa ngẽxmaxũ nixĩ i choxũ poraxêêxũ na chanaxüamaxücèx i ngẽma puracü.

2

¹ Pa Chaueneëgüx, chanaxwèxe i nüxũ pecuèx na ñuxácü poraãcü pexcèx chapuracüxũ. Rū ngẽxgumarũ ta chanaxwèxe i nüxũ pecuèx na ñuxácü poraãcü chapuracüxũ naxcèx i ngẽma taeneëgü i Laodichéaarü ñanewa ngẽxmagüxũ rü guxũma i petanüxũgü i taguma choxũ daugüxũ. ² Rū ngẽmaãcü poraãcüxüchima chapuracü na nüxũ rü ta chanangúchaũxêêxũcèx. Erü chanaxwèxe i guxũma aixcūma nügü nangechaũgü rü nüxũ nangẽxma i ngẽma mexũ i cuèx i aixcūma ixĩxũ. Rū ngẽmaãcü tá meãma nüxũ nacuèxgü ga yema noxri Tupanaxĩcatama nüxũ cuáxũ. Rū yima rü Cristutama nixĩ. ³ Rū nüma

nixĩ i nüxŭ nangẽxmaxŭ i guxŭma i cuèx i aixcŭma mexŭ. Rŭ nŭma nixĩ i taxcèx nangoxẽãxŭ i Tupanachiga. ⁴ Rŭ pemaã nüxŭ chixu i ngẽma ore erŭ tama chanaxwèxe na texé pexŭ womüxẽẽgŭxŭ namaã i țacŭ rŭ ore i chixexŭwa pexŭ gagŭxŭ. ⁵ Rŭ woo na tama ngema petanŭwa changẽxmaxŭ, natŭrŭ chauãewa rŭ poraãcŭ pegu charŭxĩnŭ. Rŭ wŭxi i chorŭ taãẽ nixĩ na nüxŭ chacuáxŭ na ñuxãcŭ meã pegŭ ipinuxŭ na meã pegŭmaã ipecuáxŭcèx rŭ ñuxãcŭ tama nüxŭ perŭxoexŭ na Cristu-axŭ peyaxõgŭxŭ.

Ñuxma na Cristuarŭ ixĩgŭxŭ rŭ ngexwacaxŭxŭ i maxŭ tŭxŭ nangẽxma

⁶ Rŭ pema ga noxri rŭ meãma tórŭ Cori ya Ngechuchu ya Cristuxŭ peyaxgŭ. Rŭ ñuxma rŭ yema noxri meãma na penayauxgŭxŭrŭrŭ rŭ name nixĩ i guxŭguma nüxna penaxã i perŭ maxŭ na nŭma pexŭ namaã inacuáxŭcèx. ⁷ Rŭ wŭxi i nanetŭ nañaxwèxe i naxchúmèxã ña nataixŭcèx rŭ na namaxŭxŭcèx. Rŭ ngẽxgumarŭ ta i pema rŭ penaxwèxe na meã Cristuna peyaxŭxgŭxŭ na meã nawa piyaetanŭxŭcèx rŭ meã naxcèx pemaxẽxŭcèx rŭ meã nüxŭ peyaxõgŭamaxŭcèx yema noxri Epáparu pexŭ ngŭxẽẽgurŭ. Rŭ name nixĩ i guxŭguma Tupanana moxẽ pexã. ⁸⁻⁹ Rŭ naxcèx pexuãẽgŭ i ngẽma duŭxŭgŭ i pexŭ womüxẽẽgŭchaŭxŭ! Rŭ tama name i nüxŭ iperŭxĩnŭẽ i ngẽma norŭ ore i tama aixcŭma ixĩxŭ rŭ taxuwama mexŭ. Erŭ ngẽma duŭxŭgŭ rŭ pexŭ nangúxẽẽchaŭ na nagu pexĩxŭcèx i ngẽma nacŭmagŭ ga nuxcŭmaŭgŭxŭ ga duŭxŭgŭ nagu ĩxŭ. Rŭ ñoma i naãneãrŭ nguxẽẽtaegŭ nixĩ i inaxĩnŭẽxŭ. Rŭ tama aixcŭma Cristuchiga nixĩ

i ngēma pexū nangúexēxū. Rū name nixī i nūxna pixīgachi i guxūma i ngēma nguxēētaeruūgū i chixexūgū rü Cristuwe perūxī. Erü Cristu rü Tupanaxūchi nixī rü guxūma i Tupanaārü pora rü Cristuwa nangēxma. ¹⁰ Rū ñuxmax, rü Tupanaārü maxū rü norü pora rü aixcūma pewa nangēxma erü naméxwa pengēxmagü ya Cristu ya namaã icuácü i guxūma i daxūcūāxārü āēxgacügü rü guxūma i ngoxogüarü āēxgacügü. ¹¹ Rü ngēma Yudfugü rü nügü ínawiechèxmüpéxechiraūgü na Tupanapéxewa yamexūcèx. Natürü ngēxguma Cristuaxū yaxōgügu rü tama ngēmaācü tamaã nanaxü ya Cristu na imexūcèx. Erü nūma ya Cristu rü tōrū maxūwa napuracü rü tūxū ínanguxūxē nawa i taxüneārü ngúchaūgü. Rü ngēmaācü nixī i tūxū yamexēxū na Tupanapéxewa imexūcèx. ¹² Rü yexguma ípebaiūgu, rü Cristu na itáxūrūū yexma natèx ga yema nuxcūmaūxū ga perü maxū. Rü yema Cristu na írüdaxūrūū rü pema rü ta penayaxu i maxū i ngexwacaxūxū, yerü peyaxōgü na Tupana norü poramaã Cristuxū írüdaxēxū. ¹³ Rü ũpa ga pema rü tama aixcūma pexū nayexma ga maxū i taguma gúxū yerü pepecaduāxgü rü pexeneārü ngúchaū pexügü. Natürü i ñuxma rü Cristuxū namaxēxūrūū pexū namaxēxē ya Tupana erü Cristuarü duūxūgü pixīgü. Rü Tupana rü marü Cristugagu tūxū nūxū nangechaū ga guxūma ga tōrū pecadugü. ¹⁴ Rü noxri rü tachixe yerü tama aixcūma naga taxīnüē ga yema mugü ga Moiché tūxna āxū, rü tōrū pecadugü rü yuwa tūxū nagagü. Natürü ga Cristu rü curuchagu tōrū pecaducèx nayu, rü yemaācü Tupana tūxū nayangutanūxē ga yema tōrū pecadugü. ¹⁵ Rü

yexguma curuchagu nayuxgu ga Cristu, rü yexguma nixĩ ga Chatanáxũ naporamaẽxũ ga Tupana. Rü yexguma nixĩ ga guxũ ga duũxũgüpéxewa Chatanáxũ naxānexẽxũ ñoma wüxi i churaragüarü ãẽxgacü i norü uwanü i nüxũ naporamaẽxũxũ naxānexẽxũrũ.

Name nixĩ i naxcèx tadaugü i ngẽma mexũgü i daxũguxũ i nañewa ngẽxmagüxũ

¹⁶ Rü ñuxma rü taxucèxma tüxcüũ pexũ nixu i ngẽma Yudíugü ega woo tama naxrũũ penaxũxgux. Nümagü rü ñuxre i õnagüxicatama nangõxgü, rü ñuxre i axeũxĩ-catama nixaxgü, rü ñuxre i petaarü ngunexũgü naxauregü na ngẽmaãcü Tupanaxũ yacuèxũgüxücèx. Rü nangẽxma i norü peta i gucü ya tauncügu Tupanacèx naxauregüxũ rü togü i petagü i gucü ya tauemacügu naxauregüxũ. Rü nüxũ nangẽxma i nacümagü na ñuxãcü ngũxchigaarü ngunexũgü naxauregüxũ. ¹⁷ Rü aixcüma yema nuxcümaũgüxũ ga Yudíugü rü nanaxauregü ga yema nacümagü yerü ga Cristu rü tauta ínangu ga yexguma. Natürü i ñuxma rü marü ínangu ya Cristu rü tórü pecaducèx nayu. Rü ñuxma rü name nixĩ na naga ixĩnüẽxũ rü tama nagu ixĩxũ i ngẽma nuxcümaũgüxũ i nacümagü. ¹⁸ ;Rü tãütáma naga pexĩnüẽ i ngẽma duũxũgü i nüxũ ixugüxũ na ipeyarütauxexũ ega tama daxũcũāx i orearü ngeruũgüxũ picuèxũũgügu! Nümagü rü tama nügü nicuèxũũgüneta rü nügü nixugü na yangoxetügüxũ. Rü noxrütama cuèxmaãmare nügü nicuèxũũgü. ¹⁹ Natürü i nümagü rü tama aixcüma naga naxĩnüẽ ya yima taeru ixĩcü ya Cristu ya tüxũ poraexẽecü rü tüxũ iyaetanüxẽecü i tórü õwa i guxāma i yixema i norü duũxũgü ixĩgüxe. Rü nüma ya Cristu nixĩ i wüxigu tüxũ naxĩnüẽxẽxũ i

wüxichigü i yixema ngẽma Tupana naxwèxexürüü. ²⁰ Rū yexguma nayuxgu ga Cristu rü yexma nayu ga nuxcümaũxũ ga perü maxũ, rü yexma nayarüxo ga guxũma ga nuxcümaũgüxũ ga pecümagü i ñoma i naãnecũāx i duũxũgü nagu rüxĩnũēxũ. Rū ngẽmacèx i ñuxmax ĵrū tũxcüũ nixĩ i ñoma i naãnecũāx maxẽxürüü nagu pemaxẽxũ i pemax, rü tũxcüũ nixĩ i ngẽma Yudfugücümagu pexĩxũ? ²¹ Rū nūmagü i Yudfugü rü nüxũ nixugüe rü ñanagürügü:

“Tama name i nüxũ quingögü i ngẽã, rü tama name i cunangõx i yea, rü tama name i cunayaxu i ngẽma”, ñanagürügü. ²² Natürü guxũma i ngẽma nacümagü rü paxa tá inayarüxo erü duũxũgüarü nixĩgü. Rū ngẽma pexũ namuxũ rü duũxũgüarü mugümare nixĩ. Rū ngẽma pexũ nangúexẽēxũ rü duũxũgüarü nguxẽētaemare nixĩ. ²³ Rū guxũma i ngẽma pexũ namuxũ rü pexcèx namexcüraxũ erü pexũ naxucuxègü na tacü pexauregüxücèx, rü tama pegü picuèxüũgüxücèx, rü meã pexenemaã ipecuèxgüxücèx. Natürü guxũma i ngẽma mugü rü tama aixcüma pexũ narüngüxèē na nüxũ perüxoexücèx i pexeneärü ngúchaũgü.

3

¹ Rū ñuxma i pemax, rü Cristu wena maxũxürüü rü pexũ nangẽxma i maxũ i ngexwacaxũxũ. Rū ngẽmacèx name nixĩ i naxcèx pedau i ngẽma mexũgü i daxũguxũ i naãnewa ngẽxmaxũ i ngextá Cristu rü Tupanaärü tũgü necüwawa írutoxũwa rü namaã āẽxgacü íyĩxũwa. ² Rū name nixĩ i guxũguma nagu perüxĩnũē i ngẽma daxũguxũ i naãnewa ngẽxmaxũ i ngemaxũgü rü tama i ngẽma ñoma i naãnewa ngẽxmaxũ. ³ Yerü yexguma

nayuxgu ga Cristu rü yexma nayu ta ga nuxcümaũxũ ga perü maxũ. Rü ñuxma rü pexũ nangëxma i perü maxũ i ngexwacaxũxũ erü Cristutanũxũ pixĩgü rü Tupanaméxëwa pengëxmagü. ⁴ Rü nümatama ya Cristu nixĩ i pexũ namaxëxëxũ. Rü ngëxguma wena núma nangoxgu, rü namaã tá pengóe, rü naxrüũ tá pimexëchi.

Marü nüxũ tarüxo i nuxcümaũxũ i tacüma i chixexũgü rü tanayaxu i ngexwacaxũxũ i tórü maxũ

⁵ Rü ñuxma rü name nixĩ i nüxũ perüxoe i guxũma i ñoma i naãneärü chixexũ i pewa ngëxmaxũ. Rü tama name i pemëxna naĩ i ngemaã pemaxë, rü tama name i petena naĩ ya yatümaã pemaxë. Rü tama name i penaxü i pexeneärü ngúchaũ rü bai i nagu perüxĩnüemare. Rü tama name i pexũ nangúchaũ i tacü rü to i chixexũgü. Rü tama name i pegünaxĩcatama penanuxuchigüchaũ i guxũma i ngëmaxũgü, erü yixema ngëma nacüma tüxũ ngëxmaxë rü düxwa namaã tatupanaãx. ⁶ Rü guxũma i ngëma chixexũgücëx tá nixĩ i Tupana napoxcuexũ i ngëma duũxũgü i ngëmaãcü maxëxũ rü tama naga ñnüëchaũxũ. ⁷ Rü pema ga ũpa rü penaxü ga yema chixexũgü, rü yemaãcü pemaxë. ⁸ Natürü i ñuxma rü name nixĩ i nüxũ perüxoe i guxũma i ngëma na pegüchi pexaixũ, rü pegümaã penuëxũ, rü chixri pemaxëxũ, rü pegümaã peguxchigagüxũ, rü guxũma i ngëma chixexũ i dexa i nüxũ pixuxũ. ⁹ Rü tama name i pegümaã pidorae, erü marü ípenatëx ga nuxcümaũxũ ga pecüma rü guxũma ga yema chixexũgü ga ũpa pexügüxũ. ¹⁰ Rü ñuxma rü marü penayaxu i ngexwacaxũxũ i perü maxũ rü ngexwacaxũxũ i duũxũgü pixĩgü. Rü guxũ i ngunexũgu rü Tupana pexũ ningexwacaxũxëëchigü na yexeraãcü pimexüçëx

naxrũũ rü yexeraãcü nüxũ na pecuègxũcèx ya Tanatü ya Tupana ya maxũ tüxna ãcü. ¹¹ Rü ñuxma rü Tupanacèx rü nüetama nixĩ ega Yudíu quixĩgu rü éxna tama. Rü nüetama nixĩ ega ícuwiechèx-müpéxechiraũgu rü éxna tama. Rü nüetama nixĩ ega tacü rü nachiũñanecũãx i duũxũ quixĩgu, rü éxna tacü rü duũxũ quixĩgu. Rü nüetama nixĩ ega wüxi i coriarü duũxũ quixĩgu, rü éxna taxúxearüma duũxũ quixĩgu. Erü ñuxma rü ngẽma guxũãrũ yexera aixcüma tüxũ mexũ nixĩ na Cristu rü guxũãrũ ãëxgacü yĩxũ rü guxãwama nangëxmaxũ. ¹² Rü ñuxma ya Tupana rü pexũ nangechaũ i pema rü pexũ nadei na noxrü pixĩgxũcèx. Rü ngẽmacèx name nixĩ i guxũguma pexũ nangechaũtümũũgü i togü, rü namaã pemecümagü, rü tauxchaãcüma nüxna penaxã, rü taguma napéxewa pegü picuèxũgü. Rü ngëxguma woo tacü pemaã naxũxgux rü name nixĩ i yaxna namaã pexĩnüẽ. ¹³ Rü name nixĩ i wüxichigü i pema na pegümaã yaxna pexĩnüexũ. Rü ngëxguma chi texé tacü pemaã üxgux, rü name nixĩ i pegüxũ nüxũ pengechaũgü i ngẽma. Rü yexgumarũũ ga tórü Cori na pexũ nüxũ ngechaũxũrũũ, rü name nixĩ i togüaxũ nüxũ pengechaũgü. ¹⁴ Rü guxũãrũ yexera mexũ nixĩ na pegü pengechaũgüxũ. Erü ngëxguma aixcüma pegü pengechaũgügu rü aixcüma wüxigu tá perüxĩnüẽ, rü meã pegümaã tá pemaxẽ. ¹⁵ Rü name nixĩ na pemaã inacuáxũ i ngẽma taã i Cristu pexna ãxũ na ngẽmaãcü aixcüma pegü pengechaũgxũcèx. Yerü yemacèx nixĩ ga Tupana pexũ dexũ na wüxitama i duũxũgü pixĩgxũcèx rü meã wüxigu perüxĩnüexũcèx. Rü name nixĩ i moxẽ nüxna pexãgü ya Tupana. ¹⁶ Rü name nixĩ i guxũguma

peãewa nangẽxma i Cristuarü ore rü taãẽãcüma naga pexĩnüẽ. Rü name nixĩ i meã peãẽxũ pecuããcüma namaã pegü pengúexẽẽ rü pegü pixucuxẽgü na ngẽmaãcü pegüaxũ penangúchaũẽẽxũcèx. Rü name nixĩ i aixcüma Tupanana moxẽ pexãgüãcüma naga pewiyaegü i nagúxũraũxũ i norü wiyægü. ¹⁷ Rü guxũma i ngẽma pexũxũ rü nüxũ pixuxũ rü name nixĩ i tórü Cori ya Ngechuchuégagu penaxü. Rü name nixĩ i ngẽmaãcü Ngechuchuégagu Tanatü ya Tupanana moxẽ pexãgü.

Tupana nanaxwẽxe na meã namaxẽxũ i duũxũgü i Cristuaxũ yaxõgüxũ

¹⁸ Pa Ngexũgü i Ātegüxũx, rü name nixĩ i petega pexĩnüẽ. Erü woetama ngẽma nixĩ i mexũ na penaxũxũ erü tórü Cori ya Cristuarü duũxũgü pixĩgü. ¹⁹ Pa Yatügü i Āmaxgüxũx, rü name nixĩ i ngĩxũ pengechaũgü i pemèxgü. Rü tama name na ngĩmaã pechixecümagüxũ. ²⁰ Pa Buxũgüx, rü name nixĩ i guxũwama penatü rü peega pexĩnüẽ, erü ngẽma nixĩ i namaã nataãẽxũ ya tórü Cori. ²¹ Pa Papágüx, rü tama name i penanuxẽẽ i pexacügü. Erü ngẽxguma ngẽmaãcü penaxũxgux rü ngürüãchi tá nüxũ nawèxtümüũ i ngẽma namaã nüxũ pixuxũ. ²² Pa Duũxũgüx i Ixããrü Coriãxgüxũx, rü name nixĩ i guxũwama naga pexĩnüẽ i perü corigü i ñoma i naãnewa pemaã icuèxgüxũ. Rü tama name i pexũ nadaugüguxicatama meã pepuracüe na ngẽmaãcü penataãẽxẽxũcèx. Natürü name nixĩ i mexũ i perü ngúchaũmaã guxũguma meã pepuracüe erü tórü Corixũ pemuũẽ. ²³ Rü guxũma i ngẽma perü puracü i pexũxũwa rü name nixĩ i perü ngúchaũmaã penaxü ñoma tórü Cori ya Cristuaxũ pepuracüexürüũ rü tama i duũxũgüaxũ. ²⁴ Rü marü nüxũ

pecuèx rü daxüguxĩ i nañnewa rü tórü Cori ya Cristu tá pexna nanaxã i perü ãmare i maxũ i taguma gúxũ. Erü yima Cristu ya aixcúma perü Cori ixĩcüaxũ nixĩ i pepuracüexũ. ²⁵ Natürü yíxema chixexũ üxe rü tá ta tanayaxu i tümaãrü natanü naxcèx i ngẽma chixexũ i taxüxũ, rü aixcúma Tupana tá tüxũ napoxcu. Erü Tupanapéxewa rü guxũma i duĩxũgü rü nawüxigu, rü taxucürüwama texé Tupanachèxwa tiña ega chixexũ taxüxgux.

4

¹ Rü pemax, Pa Corigüx, rü name nixĩ i perü duĩxũgümaã pemecümagüxũ, rü tama penawomüxèxũ. ¡Rü nüxna pecuèxãchie na pema rü ta pexũ nangẽxmaxũ ya perü Cori ya daxügücü! ² ¡Rü guxũguma peyumüxègü, rü pexuãègü na tama chixexũgu peyixücèx! ¡Rü Tupanana moxè pexãgü! ³ ¡Rü toxcèx rü ta peyumüxègü na Tupana toxũ natauxchaxèxũcèx na nüxũ tixuxücèx i norü ore i mexũ, rü meãma duĩxũgümaã nüxũ tixuxücèx i ngẽma ore ga noxri tama nüxũ nacuèxgüxũ i Cristuchiga! Rü ngẽma orecèx nixĩ i ñuxma ichapoxcuxũ. ⁴ Rü chanaxwèxe i chauxcèx peyumüxègü na meã duĩxũgücèx chanangoxèxũ i ngẽma ore, erü ngẽma nixĩ i mexũ na chanaxüxũ. ⁵ ¡Rü meã pemaxè napéxewa i ngẽma duĩxũgü i tama yaxögüxũ! ¡Rü ñuxma na pexũ natauxchaxũ, rü yoxni paxa penaxüx i Tupanaãrü puracü! ¡Rü taxũ i perüichomarexũ! ⁶ Rü ngexguma togü i duĩxũgümaã pidexagügu, rü name nixĩ i penataãèxèè namaã i ngema dexe i namaã nüxũ pixuxũ. ¡Rü ngemaãcü mea penangaxũ i ngema pexna cèxũ nachiga i perü õ!.

Pauru nanaguxēē ga norū popera rü wenaxārü yema duūxūgūxū narūmoxē

⁷ Rü nüma ya taeneē ya Tíquicu ya nüxū ingechaūgücü rü aixcūma choxū narūngūxēē rü wūxigu chomaā Cori ya Tupanacèx napuracü. Rü nüma tá pemaā nüxū nixu i chauchiga. ⁸ Rü ñuxma rü petanüwa chanamu na pexū nataāēxēxūcèx rü pemaā nüxū yaxuxūcèx na ñuxācü toxū nangupetūxū i tomox. ⁹ Rü Tíquicumaā petanüwa chanamu i Onéchimu ya taeneē ya nüxū ingechaūgücü ya aixcūma meā Tupanaārü puracü ücü. Rü nüma rü petanūxū nixī. Rü nümagü tá nixī i pemaā nüxū yaxugūxū na tacü ngupetūxū i núma. ¹⁰ Rü pexū narūmoxē i Aritācu i wūxigu chomaā poxcuxū. Rü ngēxgumarūū ta pexū narūmoxē i Marcu i Bernabéeneē ixixū. Rü marü pemaā nüxū chixu i Marcuchiga na meā penayauxgūxūcèx i ngēxguma petanüwa nanguxgu. ¹¹ Rü ngēxgumarūū ta pexū narūmoxē ya taeneē ya Ngechuchu ya Ixaixcūmacügu āegacü. Rü ngēma tomaēxpūx i yatūgü rü ngēxīcatama nixī i Yudūgü i yaxōgūxū i wūxigu chomaā puracüxū i Tupanaārü puracüwa. Rü nümagü rü poraācü choxū nataāēxēgü. ¹² Rü ngēxgumarūū ta pexū narūmoxē i Epáparu. Rü nüma rü petanūxū nixī, rü aixcūma nanaxü i Cristuarü puracü. Rü nüma rü norū yumūxēwa rü guxūguma Tupanaxū nacèxū pexcèx na aixcūma meā pemaxēxūcèx rü peyaxōgūamaxūcèx rü aixcūma penaxūxūcèx i ngēma Tupana naxwèxexū. ¹³ Rü choma rü marü nüxū chadau rü pemaā nüxū chixu i ñuxācü Epáparu poraācü pexcèx napuracü rü naxcèx napuracü i ngēma taeneēgü i Laodichéaarü ñānewa rü Iráporiarü ñānewa ngēxmagūxū. ¹⁴ Rü Luca ya duturu ixīcü ya nüxū ingechaūgücü, rü pexū narūmoxē. Rü ngēxgumarūū ta

pexũ narũmoxẽ i Dema. ¹⁵ ¡Rũ chauégagu nũxũ perũmoxẽgũ i taeneẽgũ i Laodichéawa ngẽxmagũxũ! ¡Rũ ngẽxgumarũũ ta nũxũ perũmoxẽgũ i Nifa rũ guxũma i taeneẽgũ i yaxõgũxũ i napatawa ngutaquégũxũ! ¹⁶ Rũ ngẽxguma marũ nũxũ pedamatũguwena i ñaã popera, rũ chanaxwèxe i Laodichéawa penamu na nge-macũãx i taeneẽgũ rũ ta nũxũ nadaumatũgũxũcèx. Rũ ngẽxgumarũũ ta i ngẽma popera i Laodichéawa chamuxũ, rũ ngẽxguma pexũtawa nanguxgu rũ chanaxwèxe i nũxũ pedamatũgũ. ¹⁷ Rũ chanaxwèxe i Ariquípumaã nũxũ pixu, rũ ñapegũgũ nũxũ:

“¡Rũ meã napuracũ rũ yanguxẽẽ i ngẽma puracũ i tórũ Cori cuxna ãxũ!” ñapegũgũ nũxũ. ¹⁸ Choma i Pauru rũ choxméxmaãtama pexcèx chanaxũmatũ i ñaã chorũ moxẽ. ¡Rũ nũxna pecuèxãchie na chapoxcuxũ! Rũ chanaxwèxe i Tupana pexũ narũngũxẽẽ.

Rũ nuãma pexna,
Pauru

Tupanaarü Ore i Tóriu Cori ya Ngechuchu ya Cristuchiga
New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective

copyright owners.

2014-04-30

PDF generated using Haiola and XeLaTeX on 14 Jun 2022 from source files dated 28 May 2022

9d5dc22a-30be-5d26-85a9-76047f4c89e6